

(2) Troškove prijevoza u cilju odlaska i povratka iz lječilišta snose korisnici prava.

Član 24.

(Ugovori sa lječilištima)

Ugovorom između Ministarstva i lječilišta regulišu se pitanja broja korisnika prava po smjeni (grupi), dužine trajanja smjena, cijene jednog bolesničkog dana, načina i uvjeta plaćanja i druga pitanja kojim se uređuju međusobni odnosi.

Član 25.

(Vođenje evidencije)

Elektronsku evidenciju o podnesenim zahtjevima i korisnicima prava po ovoj Uredbi vode gradske/općinske službe i Ministarstvo, po obrascima koje propisuje ministar Ministarstva, u roku od sedam dana od dana stupanja Uredbe na snagu.

Član 26.

(Ravnopravnost spolova)

Sve imenice koje se odnose na branioce i članove njihovih porodica, upotrijebljene u ovoj Uredbi samo u muškom ili samo u ženskom rodu, odnose se na oba spola.

Član 27.

(Stavljanje Uredbe van snage)

Danom početka primjene ove Uredbe prestaje važiti Uredba o medicinskoj rehabilitaciji branilaca i članova njihovih porodica u banjsko-klimatskim lječilištima ("Službene novine Zeničko-dobojskog kantona" broj 4/14 i 15/21).

Član 28.

(Stupanje na snagu i objavljivanje Uredbe)

Ova Uredba stupa na snagu osmog dana od dana objavljivanja u "Službenim novinama Zeničko-dobojskog kantona", a primjenjuje se od 01.01.2025. godine.

Broj: 02-02-21443/24
Datum, 27.12.2024. godine
Zenica

P R E M I J E R
Nezir Pivić, s.r.

Na osnovu člana 16. stav (1) Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona", broj 7/10 i 3/23) i člana 21. Zakona o dopunskim pravima branilaca i članova njihovih porodica ("Službene novine Zeničko-dobojskog kantona" broj 15/24), na prijedlog Ministarstva za boračka pitanja, Vlada Zeničko-dobojskog kantona, na 63. sjednici, održanoj dana 27.12.2024. godine, d o n o s i

U R E D B U

O VANREDNOJ NOVČANOJ POMOĆI BRANIOCIMA I ČLANOVIMA NJIHOVIH PORODICA

DIO PRVI - OPĆE ODREDBE

Član 1.

(Predmet Uredbe)

Ovom Uredbom utvrđuju se uslovi, način i postupak ostvarivanja prava na vanrednu novčanu pomoć za osnovne potrebe branilaca i članova njihovih porodica koji imaju prebivalište na području Zeničko-dobojskog kantona (u daljnjem tekstu: Kanton), kao i povratnika u entitet Republiku Srpsku koji ostvaruju osnovna prava iz branilačko-invalidske zaštite u gradovima/općinama Kantona i koji su na evidenciji nadležnog organa za vojne evidencije u gradovima/općinama Kantona.

Član 2.

(Korisnici prava)

Novčanu pomoć po ovoj Uredbi mogu ostvariti:

- dobitnik ratnog priznanja i odlikovanja;
- ratni vojni invalid;
- demobilizirani branilac koji je u periodu od 06.04.1992. do 23.12.1995.godine u sastavu Oružanih snaga proveo najmanje 24 mjeseca odnosno 12 mjeseci, ukoliko je u Oružane snage pristupio kao maloljetno lice ili šest mjeseci po punoljetstvu;
- član porodice šehida, poginulih, umrlih i nestalih branilaca-korisnik porodične invalidnine;
- član uže porodice umrlog dobitnika ratnog priznanja i odlikovanja-korisnik mjesečnog novčanog dodatka;

- f) član uže porodice umrlog ratnog vojnog invalida - korisnik porodične invalidnine i
- g) član uže porodice umrlog demobiliziranog branioca koji je u periodu od 06.04.1992. do 23.12.1995. godine u sastavu Oružanih snaga proveo najmanje 24 mjeseca odnosno 12 mjeseci, ukoliko je u OS pristupio kao maloljetno lice ili šest mjeseci po punoljetstvu - supružnik i dijete dok je na redovnom školovanju.

Član 3.
(Posebni korisnici)

Prava po ovoj Uredbi mogu koristiti i:

- a) dijete šehida, poginulog, umrlog i nestalog branioca nakon prestanka prava na porodičnu invalidninu i dijete umrlog dobitnika ratnog priznanja ili odlikovanja, kojem je prestalo pravo na mjesečni novčani dodatak.
- b) roditelj umrlog dobitnika ratnog priznanja ili odlikovanja, umrlog ratnog vojnog invalida i umrlog demobiliziranog branioca koji je u periodu od 06.04.1992. do 23.12.1995. godine u sastavu Oružanih snaga proveo najmanje 24 mjeseca odnosno 12 mjeseci, ukoliko je u Oružane snage pristupio kao maloljetno lice ili šest mjeseci po punoljetstvu, koji nema druge članove uže porodice i koji je sa istim živio u zajedničkom domaćinstvu.

Član 4.
(Uslovi)

- (1) Novčanu pomoć po ovoj Uredbi, lica iz člana 2. i 3. ove Uredbe mogu ostvariti pod uslovom da:
 - a) imaju prebivalište na području Kantona u trajanju od najmanje dvije godine neprekidno do dana podnošenja zahtjeva, osim povratnika u entitet Republiku Srpsku;
 - b) nisu u radnom odnosu, izuzev lica koja su na čekanju posla duže od šest mjeseci u zadnjih godinu dana;
 - c) oni i članovi njihovog porodičnog domaćinstva nisu vlasnici ili suvlasnici subjekta koji obavlja privrednu ili drugu djelatnost;
 - d) sredstva za naznačene potrebe nisu ostvarili po nekom drugom pravnom osnovu i
 - e) da ukupna oporeziva primanja porodičnog domaćinstva ne prelaze iznos od 50% od prosječne

neto plaće isplaćene u Federaciji Bosne i Hercegovine u prethodnoj kalendarskoj godini, prema podacima Zavoda za statistiku Federacije Bosne i Hercegovine.

- (2) Vanredna novčana pomoć može biti odobrena jednom u toku kalendarske godine.

Član 5.
(Dokazivanje statusa)

U postupku ostvarivanja prava, branilac i član njegove porodice svoj status dokazuju rješenjem nadležne gradske/općinske službe o priznavanju svojstva dobitnika ratnog priznanja i odlikovanja i ratnog vojnog invalida, odnosno člana porodice šehida, poginulog, umrlog, nestalog branioca i člana uže porodice poginulog, umrlog ili nestalog dobitnika ratnog priznanja i odlikovanja, ili uvjerenjem nadležnog organa izdatog u skladu sa Zakonom o upravnom postupku ("Službene novine FBiH" broj 2/98, 48/99 i 61/22), a demobilizirani branilac uvjerenjem VFMB-3a izdatog od strane nadležne Grupe za pitanja evidencija iz oblasti vojne obaveze.

DIO DRUGI - POSTUPAK DODJELE POMOĆI

Član 6.
(Podnošenje zahtjeva)

- (1) Pravo na novčanu pomoć može se ostvariti podnošenjem zahtjeva gradskoj/općinskoj službi nadležnoj za poslove branilačko-invalidske zaštite u gradu/općini u kojoj podnosilac zahtjeva ima prebivalište, odnosno u kojoj ostvaruje prava iz branilačko-invalidske zaštite ili u kojoj se nalazi na evidenciji nadležnog organa za vojne poslove (u daljnjem tekstu: gradska/općinska služba).
- (2) Zahtjev iz stava (1) ovog člana podnosi se na posebnom obrascu kojeg propisuje ministar Ministarstva za boračka pitanja Zeničko-dobojskog kantona (u daljnjem tekstu: Ministarstvo) u roku od sedam dana od dana stupanja na snagu ove Uredbe.
- (3) Vanrednu novčanu pomoć branioci i članovi njihovih porodica ostvaruju u slučajevima vanrednih okolnosti kao što su elementarne nepogode i nesreće, smrt i bolest člana zajedničkog domaćinstva i u drugim slučajevima koji uzrokuju tešku ekonomsku situaciju i egzistencijalnu ugroženost, te potrebu osiguranja neophodnih sredstava.

(4) Vanredna novčana pomoć licima iz člana 2. stav (1) tačka a), b) i c) ove Uredbe može se izuzetno odobriti u iznosu do 3.000,00 KM za sufinansiranje plaćanja neuplaćenih doprinosa. Za navedenu svrhu pomoć se može odobriti samo ukoliko tu pomoć ne mogu ostvariti po drugom pravnom osnovu u slučaju kada je obveznik uplate doprinosa pravno lice ili obrt koje je likvidirano, u stečaju ili prestrukturirano i da se se iz priložene dokumentacije može utvrditi opravdanost takvog zahtjeva, a u cilju ostvarivanja prava na penziju.

Član 7.

(Potrebna dokumentacija)

- (1) Uz zahtjev za dodjelu novčanih sredstava podnosilac zahtjeva prilaže sljedeću dokumentaciju u originalu ili ovjerenoj kopiji:
 - a) dokaz o statusu branioca i člana porodice branioca;
 - b) uvjerenje o kretanju (kao dokaz o prebivalištu);
 - c) dokaz o nezaposlenosti za podnosioca zahtjeva i članove zajedničkog domaćinstva (uvjerenje nadležne Poreske ispostave o statusu osiguranika odnosno da se isti ne vodi u jedinstvenom sistemu uplate doprinosa) ili uvjerenje preduzeća o periodu čekanja na posao;
 - d) dokaz o prihodima zaposlenih članova zajedničkog domaćinstva – uvjerenje o prosječnoj plaći u posljednja tri mjeseca prije podnošenja zahtjeva;
 - e) izjava da podnosilac zahtjeva i članovi zajedničkog domaćinstva nisu vlasnici ili suvlasnici subjekta koji obavlja privrednu ili drugu djelatnost;
 - f) izjava o zajedničkom domaćinstvu (kućna lista);
 - g) izjava da sredstva za naznačene potrebe nisu ostvarili po nekom drugom pravnom osnovu i
 - h) druge dokaze iz kojih se vidi opravdanost zahtjeva.
- (2) Sredstva po ovoj Uredbi ne mogu ostvariti osobe za koje se utvrdi da su u zahtjevu i priloženoj dokumentaciji prikriili ili dali netačne podatke ili dokumente.

Član 8.

(Gradska/općinska komisija)

- (1) U postupku po zahtjevu gradska/općinska služba formira komisiju (u daljnjem tekstu: Komisija).
- (2) Zadatak Komisije je da:
 - a) utvrdi kompletnost podnesene dokumentacije i zahtjeva, otklanjanje uočenih nedostataka i eventualno dopunu dokumentacije;

b) u slučaju potrebe izvrši neposredan uviđaj u stvarima iz zahtjeva i

c) predloži odbacivanje, odbijanje zahtjeva ili odobravanje novčane pomoći sa izvještajem o socijalno-ekonomskoj situaciji podnosioca zahtjeva i njegove porodice.

Član 9.

(Postupak po zahtjevu)

Na osnovu prijedloga Komisije, gradska/općinska služba:

- a) donosi rješenje o priznavanju prava na novčanu naknadu u iznosu do 400,00 KM;
- b) obrazložen prijedlog sa kompletnom dokumentacijom podnosioca zahtjeva i prijedlogom o visini novčane pomoći u iznosu iznad 400,00 KM dostavlja Ministarstvu;
- c) dostavlja obrazložen prijedlog o odbacivanju ili odbijanju zahtjeva.

Član 10.

(Komisija Ministarstva)

- (1) Dostavljene prijedloge za odobravanje, odbijanje i odbacivanje pomoći razmatra tročlana komisija, koju posebnim rješenjem imenuje ministar Ministarstva (u daljnjem tekstu: Komisija Ministarstva).
- (2) Zadatak Komisije Ministarstva je da razmotri dostavljene prijedloge gradskih/općinskih službi, izvrši uvid u priloženu dokumentaciju, konstatuje ispravnost postupka, te dostavi ministru Ministarstva obrazložen stav o odbacivanju, odbijanju ili opravdanosti zahtjeva sa prijedlogom o dodjeli novčane pomoći.
- (3) U svom radu po podnesenim zahtjevima, Komisija Ministarstva ima pravo vršiti provjeru podnesene dokumentacije, tražiti dopunu iste, te u posebnim slučajevima izvršiti neposredan uviđaj u stvarima iz zahtjeva.

Član 11.

(Posebni slučajevi)

U posebnim slučajevima koji nisu definisani ovom Uredbom, a po svemu su specifični i zahtijevaju hitno rješavanje, na zahtjev proslijeđen od gradske/općinske službe i uz obrazložen prijedlog Komisije Ministarstva, odobravanje sredstava u iznosu do 2.000,00 KM vrši ministar Ministarstva.

Član 12.**(Odobranje sredstava)**

- (1) Na osnovu prijedloga Komisije Ministarstva o dodjeli sredstava po podnesenim zahtjevima u pojedinačnim iznosima koji ne prelaze iznos od 2.000,00 KM odlučuje ministar Ministarstva.
- (2) Na obrazloženi prijedlog Ministarstva zaključak o odobranju dodjele sredstava u iznosu većem od 2.000,00 KM donosi Vlada Kantona.

Član 13.**(Izdavanje rješenja i plaćanje)**

- (1) Na osnovu dostavljene obavijesti Ministarstva, gradska/općinska služba donosi rješenje o odobranju pomoći, odbacivanju ili odbijanju zahtjeva.
- (2) Na osnovu dostavljenih pravosnažnih rješenja Ministarstvo donosi odluku o plaćanju odobrenih sredstava za vanrednu novčanu pomoć.

Član 14.**(Rješavanje po žalbi)**

O žalbi na rješenja gradske/općinske službe rješava Ministarstvo.

Član 15.**(Dostava i pravdanje sredstava)**

- (1) O doznačenim sredstvima za isplatu novčane pomoći gradska/općinska služba obavještava korisnike i istim vrši isplatu putem tekućih računa.
- (2) Gradska/općinska služba je dužna Ministarstvu dostaviti pravdanje utrošenih sredstava u roku od 15 dana po izvršenju isplate.

DIO TREĆI - ZAVRŠNE ODREDBE**Član 16.****(Sredstva za ostvarivanje prava)**

Sredstva za realizaciju prava branilaca i članova njihovih porodica po ovoj Uredbi, osiguravaju se u Budžetu Kantona u skladu sa prilivom sredstava.

Član 17.**(Evidencija i obrasci)**

Elektronsku evidenciju o podnesenim zahtjevima i korisnicima prava po ovoj Uredbi vode gradske/općinske službe i Ministarstvo, po posebnim obrascima koje propisuje ministar Ministarstva u roku od sedam dana od dana stupanja na snagu ove Uredbe.

Član 18.**(Instrukcije i nadzor)**

- (1) U realizaciji ove Uredbe ministar Ministarstva može donijeti odgovarajuće instrukcije.
- (2) Nadzor nad provođenjem ove Uredbe ima Ministarstvo.

Član 19.**(Ravnopravnost spolova)**

Sve imenice koje se odnose na braniocice i članove njihovih porodica, upotrijebljene u ovoj Uredbi samo u muškom ili samo u ženskom rodu, odnose se na oba spola.

Član 20.**(Stavljanje Uredbe van snage)**

Danom početka primjene ove Uredbe prestaje važiti Uredba o vanrednoj novčanoj pomoći braniocima i članovima njihovih porodica ("Službene novine Zeničko-dobojskog kantona" broj 4/14, 1/18, 15/21 i 3/24).

Član 21.**(Stupanje na snagu i objavljivanje Uredbe)**

Uredba stupa na snagu osmog dana od dana objavljivanja u "Službenim novinama Zeničko-dobojskog kantona, a primjenjuje se od 01.01.2025. godine.

Broj: 02-02-21444/24
Datum, 27.12.2024. godine
Zenica

P R E M I J E R
Nezir Pivić, s.r.

5.

Na osnovu člana 16. stav (1) Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona", broj 7/10 i 3/23) i člana 28. stav (3) Zakona o dopunskim pravima branilaca i članova njihovih porodica ("Službene novine Zeničko-dobojskog kantona" broj 15/24), na prijedlog Ministarstva za boračka pitanja, Vlada Zeničko-dobojskog kantona, na 63. sjednici, održanoj dana 27.12.2024. godine, d o n o s i